



## Sos aposentos de sa poesia in Biddanoa Monteleone

de Domitilla MANNU



Remundu Piras est istadu unu de sos *mazores*, intre sos poetes a bolu chi amus àpidu in Sardigna, creu chi custa siet cosa nòdida a totus. Biddanoa Monteleone, sa bidda sua, cun rejone l'at fatu onore, dedichende-li "Sos

*apostos de sa poesia*" in Sa Domo Manna, su museu etnograficu. Su progetu est istadu dissignadu e ammaniadu dae s'ATI (Assòtziu temporaneu de impresa) MONTE BARANTA e A S'ANDIRA, chi contivizant e gestint su museu, gràtzias a su contributu finantiàriu de su comune de Biddanoa e de sa Provìntzia de Tàtari. Gioja 20 de làmpadas s'est tenta sa tzerimònia de inauguratzione.



Su sindigu de Biddanoa, Chirigu Meloni at espressadu peràulas de cuntentesa pro custu progetu bènnidu a giompimentu in sa mezus manera, e s'assessore a sa cultura Daniele Sanna at batidu su saludu e sas bonas uras de s'Amministrazione de sa Provìntzia de Tàtari. Fint presentes sos familiares de Remundu Piras, biddanoesos e fintzas zente foristera. Est istada una serada ammanizada abberu bene, e massimu a totu sunt istadas de importu mannu e pretziadas meda sas relatas de sos duos istudiosos giamados a onorare sa figura de su poete; Salvatore Zucca, at faeddadu de *"Sa poesia a bolu in s'istòria"* incomintzende dae sos tempos in antis de Omero e sighende fintzas a dies de oe. Pàulu Pillonca at faeddadu de *"Remundu Piras e s'iscola de poesia de Biddanoa Monteleone"* in sa cale at ammentadu puru sos àteros poetes de sa bidida. At contadu de sa vida de su poete, de su pessare, de s'èssere e de s'ischire suos, de anèdotos e fatos cumbinados in s'andare de su tempus, siet in sas garas che in àteros mamentos, lighende a pare sas notiscias cun sas poesias chi bi deghiant o chi aiant sinnadu, in calchi modu, cussos fatos. Clara Farina at seberadu unas

cantas poesias, intre sas pius ironicas chi at iscritu Remundu Piras e la s'at lègidas a intremesu de sas relatas, cun tota s'arte e su gèniu chi li connoschimus. A finitia est istadu proietadu su documentàriu, intituladu " Il coraggio e la poesia" de Ignaziu Figus, chi sende presente nd'at faeddadu e l'at introduidu. Maria Cau, responsabile de custu trabagliu at presentadu sa serada e at faeddadu de totu sas fases de s'ammanizu de custu progetu in su tempus e at torrada gràtzias a totu sos chi l'ant sustènnidu in cale si siat manera. In " Sos aposentos de sa poesia" b'est documentada s'istòria de sa poesia a bolu in Sardigna cun fotografias e testos iscritos in tres limbas; sardu, inglesu e italianu. B'at una postatzione multimediale ue si podent iscultare sas garas de poesia de tiu Remundu Piras e in sas bidrinas bi sunt costoidos paritzos ogetos personales de su poete. Creo chi custu museu siet un'àteru contributu abberu de importu pro sa limba, sa cultura e s'istòria nostra e meressit de èssere visitadu.

22/6/2013